

Date – 18/09/2025

Time - 18:30 Hrs

HEADLINES (EVENING)

1. CSS hnuaia hnathawkten sorkara dah ngheh an ngiat chungchang ngaihtuaha ZPM Coordination Committee vawiina thukhawm chuan Dan phal chinah Regularisation Scheme siamthat ni se an ti.
2. Lunglei Dist chhung a khaw 2: Mamte khua leh Lungrang South khuaah Sazu puangin buh leh thlai tam tak a seh chhe tawh.
3. Prime Minister Narendra Modia chuan vawiin khan Interim Nepal Prime Minister Sushila Karki bia in India in puih a inhuam reng tih a hrih
4. Union Minister of State for Law and Justice Arjun Ram Meghwal chuan dankalha sumdawnna hrang hrang lakah ram mipuite venghim turin theihtawp an chhuah a ti.

<><><>

CSS INDEFINITE STRIKE

CSS hnuaia hnathawkten sorkara dah ngheh an ngiat chungchang ngaihtuaha ZPM Coordination Committee vawiina thukhawm chuan Dan phal chinah Regularisation Scheme siamthat ni se an ti.

Vawiina Chief Minister Pu Lalduhoma kaihhruai ZPM Coordination Committee thukhawm chuan CSS employees chungchang ngaihtuahin an thukhawm a, CSS Employees Regularization Scheme sawrkar hmasa, MNF sorkarin a duan sa chu tidanglam loa hman a ni a, hei hi a khirh deuh avangin CSS Employees Regularization Scheme chu danin a phal chinah awlsam deuh zawka siamthat leh nise tih a ni a, hei vang hian, CSS employee-te chu mipui harsatna siam tawh loa hna ngai chhunzawm tawh turin a ngen a ni.

Hetihlai hian CSS hnuaia thawk intelkhawm All Mizoram CSS Employees Coordination Committee, AMCECC chu an thil ngiat nawr nan nimin atanga tiamchin awm lova an chawlh zui avangin zirna in leh damdawi lama inenkawlina hmun te a nghawng tawh hle a.

Akashvani Aizawl zawhna chhangin AMCECC General Secretary Pu Vanlalpeka chuan vawiin khan Mizoram hmun hrang hranga AMCECC Sub Headquarters te chu pun khawm huaihawt vek a ti a, Aizawl huamchhunga AMCECC member te chuan Youth Recreation Centre (YRC), Falkland-ah kalkhawmin Chief Minister hova Party thuneitu thukhawm ten an thil phut chungchang an ngaihtuah chu an ngaichang tih a sawi bawk.

AMCECC member ten an thil ngiat nawr nan tiamchin awm lova an chawlh avang hian zirna in leh damdawi lama inekawlina lam a nghawng tawh hle a, Mizoram SSA Teacher Association (MSSTA) President Rokima Varte chuan CSS hnuaia zirtirtu hlang thawhna school te chu a inkhar vek a, sorkarin school hawng turin ti mahse zirna an kalpui chuang lo a ti a, CSS zirtirtu tam zawk thawhna schoolah te pawh school hawng mah se zirna pangngai a kal thei lova, zirlaite chu hnathawh leh sikul tihfai tir an ni a ti a, sorkar chuan CSS zirtirtute an nawrh avangin school khar a awm lo tih sawi mah se zirna a kal loh avangin nu leh pa tam takin an fate school an kal tir lo tih thu an dawng niin a sawi bawk.

NHM President Pu Rammawia pawhin tun hmaa Sub Centre ti-a hriat thin Health & Wellness Centre te chu District hrang hrangah khar an ni a, a nghet thawhna inhawng awmchhun te pawh hna an thawk hlei thei lo a ti a, Community Health Centres (CHC), leh Urban Primary Health Centres (UPHC) te pawh a inkhar deuh vek a, a inhawng te pawh ZMC atanga intern doctor ten an inzirna atana an hawn a ni a ti a, District Hospital-a lab technician leh X-ray technician tiamin thawktu hrang hrangte chu CSS hnuaia thawkte an nih avangin hna an thawk mumal thei lova, a inhawng te pawh an kal thei hram hram niin a sawi a, Civil Hospital, Aizawlah pawh nurse 65 leh thawktu dang tiamin CSS hnuaia thawk mi 160 vel an awm a, an chawlh vek avang hian damdawi in

hnathawh lam a nghawng hle a ti a, physiotherapist te pawh CSS hnuaia an nih avangin Civil Hospital-a Mizoram Larsap nupuiin physio therapy tih a tum pawh a hlawhchham tih a sawi a ni.

AMCECC hian Mizoram sorkar laka an thil phut hrang hrang tihhlawhtlin phutin April ni 15 atanga ni 17 chhungin pen down strike an lo nei tawh a, April ni 19 ah Mizoram sorkar nen inremna an siam hnuaia tun thlenga an thil phut chungchangah thu lawmawm hriat tur a awm loh avangin lungawi lohna lantir nan tun thla September ni 9 atanga ni 11 thleng khan Mass Casual Leave an la a, Thawhlelni khan Mizoram hmun hrang hangah pungkawmin lungawi lohna an lantir leh a, nimin Nilaini atang khan tiamchin awm lovin an chawl a ni.

<><><>

GST REFORM

Karleh Thawhtanni atanga a taka GST rate thar hman tan a nih hnuaia GST rate tihhniam hmaa bungraw lak te pawh a man a tlahniam vek tur a ni tih State Tax Commissioner Pu HK Lalhawngliana'n a sawi.

Akashvani Aizawl zawhna chhangin State Tax Commissioner Pu HK Lalhawngliana chuan karleh Thawhtanni atanga GST rate thar hman tur chungchangah hian Taxation Departmen chu an inbuatsaih mek a ti a, tunkar Thawhlelni atang khan GST rate thar siam hman hmaa bungraw man te chu Mizoram hmun hrang hranga sumdawngte hnenah an lakhawm a, GST registration neite chauh ni lovin dawr remchang apiangah an lakhawma ti a, naktuk Zirtawpniah chuan Zonal Office te chu rate an lakkhawm te thehlut vek tawh tura hriattir an nih thu sawiin, vawiin hian Aizawlah GST rate thar chungchang sawihona neih a ni a ti. He hunah hian Aizawl pawn a awmte pawh online kaltlangin an tel a, GST rate thar hman hnuaia survey an nei leh dawn tih a sawi bawka a ni.

Pu Hawngliana chuan GST rate tihhniam hmaa bungraw lak sa te pawh GST rate thar hman hunah chuan a man a tlahniamvek tur a ni a ti a, GST rate thar hman hunah rate tihhniam tawh, man to a la zuar hriate chu taxation office-ah hriattir turin mipuite a chah a, sumdawngte chu an tax return hmangin dan an zawm leh zawm loh an hre thei dawn tih a sawi bawka a ni.

State Tax Commissioner chuan GST rate tlahniam chuan mipui a nghawng ngei ngei tur a ni tih sawiin, Anti-Profitteering measures dan hmangin GST rate tlakhniamna bungraw man tihhniam ve lo sumdawngte chu hrem theih an ni a ti a, mipuite chu an dikna chanvo hre tura chahin, an thil leina cash memo chauh ni lovin, GST hnuaia in register dawr te chuan tax invoice an pe tel ngei ngei tur a ni tih a sawi bawka a ni.

<><><>

RODENTS

Lunglei Dist chhung a khaw 2: Mamte khua leh Lungrang South khuaah Sazu puangin buh leh thlai tam tak a seh chhe tawh.

Lungleia kan corr sawi danin, Mamte leh Lungrang South khuaa Lo neitute Buh leh thlai Sazu in a seh chhiate hi Dist Agriculture Office Lungleia thawktute chuan a hmunah kal chilh nghalin Sazu in Buh leh thlai a seh chhiat dan te an enfiah bakah khawtlang hruaitute hnenah Sazu tur peina hman dan tur an zirtir nghal a ni.

Mamte khua bikah hian Lo neitu chhungkaw 47 awmin Tin 46 hmun a zauvah Buhpui an ching a, Tin 6 hmun a zauvah thar rang chingin thar rang buh hi tin 5 hmun vela zau chu Sazu hian a seh chhe vek a, hei bakah hian tin 25 hmun a zauva an chin Bekang pawh a seh chhe nasa hle a ni. Lungrang South khuaah hian chhungkaw 30 in thlawhhma la in, chhungkaw 8 thlawhhmaah sazu hi a che a, tin 6 hmun vela zau buh vuite chu Sazu in an seh chhe tawh bawka. Kan corr report lo ngaithla ang.

Mamte khua leh Lungrang South a zau puang te hian thar rang buh leh Bekang an seh chhe nasa hle a Agriculture Department a thawktute chuan Sazu te hian Buhpui leh thlai dangte Sazu in a seh zel loh nan Zau puma Sazu hrai nghal turin khawtlang hruaitute an hrilh a ni.

Tunlai hian Dist Agriculture Office Lungleia thawktute chuan an in daihlo hle tih sawiin, Lo neitute buh leh thlai ei chhetu Sazu chet velna ngaihven a ngaih bakah Digital Agriculture enfiah leh Agriculture Crop hun tiam chhunga Survey a ngaih bawka

avangin an buai hle tih an sawi a, Local Council leh Village Council te chu an huam chhunga lo neitute harsatna thlen zawnga Sazu chet velna a awm chuan a rang thei ang bera Agriculture Department Office Lungleiah hriattir turin an ngen a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

SEVA PAKHWADA

BJP Mizoram chuan Seva Pakhwada Program kal zel ah vawiin khan Sairang Rail Station tihfai hnatlang an huaihawt a he hunah hian State hruaitute bakah member thahnem tak thawk chhuakin an hnatlang a ni. BJP Mizoram chuan hmasawnna hmel thar hmuh zawh hnu a Rail Station leh a chhehvela bawlhhlawh tam tak a awm nghal mai chu zialo an ti hle tih an sawi a, Hmasawnna in a ken tel pawimawh tak chu Faina a ni a, hmasawnna thar hmuh ni mahse nikhat thil thu ah Rail Station-a bawlhhlawh a tam nghal lutuk chuan inenfiah a tul zia a tilang chiang hle a ni an ti.

Rêl a lo luh tak avangin Ramdang mi, khualzin te pawhin faina an ngaih pawimawh theih nana Rail Station a bawlhhlawh paih dan System pawh thuneitu lam te'n ngun zawka enpui vat a ngaia an hriat thu sawiin, Rela zin tur tual chhung mipuite leh state pawn leh ram pawn atanga Mizoram tlawh turte pawh faina ngai pawimawh turinkan ngen a, bawlhhlawh bawm ah chauh paih turin an chah a, inthiarna hmun leh station vawnfai chu mitin mawhphurna a ni, an ti. Rail Station tihfai hnatlang neih zawh hnu hian Sairang Rail Station bulah thingphun hnatlang an huaihawt nghal bawk a ni.

<><><>

PM

Prime Minister Narendra Modia chuan vawiin khan Interim Nepal Prime Minister Sushila Karki a bia. Social Media lamah he thu hi tarlangin Pu Modia chuan tunhnaia Nepal ramah buaina chhuak avanga thi an awm chu pawl atih thu sawiin remna leh muanna a awm theihna turin India chuan a thlawp zel dawn a ti a. Natuka National Day an hman tur pualin PM Karki leh Nepal mipuite duhsakna a hlan nghal a ni.

<><><>

ARJUN RAM MEGHWAL

Union Minister of State for Law and Justice Arjun Ram Meghwal chuan dankalha sumdawnna hrang hrang lakah ram mipuite venghim turin theihtawp an chhuah a ti. Vawiina Movement Against Smuggled and Counterfeit Trade (MASCRADE) vawi 11 naah he thu hi sawiin Pu Meghwal chuan tunhnaia GST thar hman tur chuan nasa takin heng dankalha sumdawnna hi a veng dawn tih a sawi a.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nihtur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni. GST tharah hian Cycle ngaina leh hmang tangkai thinte tan Cycle man a tlahniam dawn a. Hei hian zirlaite, taksa sawizawi lama inhmangte leh thalai hnathawk tam takin an chhawr dawn hle a ni.

<><><>

SEVA PARV

Mipui rawngbawl leh sawrkar inrelbawl na tha thupaia neiin Prime Minister Narendra Modia hnuaiah ramchhungah hmasawnna tam tak thlen mek a ni. Vawiina Seva Parv Special Series ah hian Modia sawrkarin agriculture leh loneitute tihhmasawnna tura a hmalakna lo tarlang ila. Kum 11 kalta chhung khan agriculture puala budget dah hi cheng vaibelchhe sing 2 sang 2 atangin vaibelchhe nuai 1 sing 3 leh sang 7 chuangah a pung tawh a. Red Fort-a a thusawiah pawh PM Modia chuan loneitute chu an ngaih pawimawh ber thu a sawi a ni.

<><><>